

Vocero di CCDN, Lysander Besselink ta informa...

Celebracion di 25 aña Status Aparte hopi mas grandi e aña aki!



MANERA ta custumber cu tur aña riba e fecha di 17 di maart, comision celebracion dianan nacional esta CCDN, ta organisa un anochi cultural dedica na nos dia nacional cu ta 18 di maart y cu nos ta recorda cada aña, e logro y lucha cu cada un di nos estadistanan cu a pone nan schouder bou di esaki pa nos por celebra nos status aparte cu orguyo. Como cu e aña aki nos ta celebra e 25 aña di Status Aparte, Gabinete Mike Eman hunto cu CCDN a dicidi di haci e celebracion di e aña aki uno hopi mas grandi cu loke normalmente nos ta custumbra di tin riba 17 di maart.

Normalmente 17 di maart ta tuma luga un show cu ta inclui baile, musica y algun bes poesia tambe riba plaza Betico Croes, pero e biaha aki e formato aki ta cambia por completo pasobra en bes di

tin 1 escenario so cu ta esun di Plaza mes, e biaha aki lo 3 escenario, cual cada uno di nan lo bay tin nan actividad sea musical/cultural tumando luga. Ta bon pa menciona cu e cayanan cu ta core rond di plaza Betico Croes lo wordo completamente cera pa e celebracion gigantesco aki.

E cayanan ta Vondellaan, Stadionweg y Rumbastraat. Pa loke cu ta tent di cuminda y artesanía y otro articulonan tambe ta conoce un cambio e biaha aki, dor cu nos lo pone esakinan riba caminda den e cayanan menciona pa crea un ambiente di feria. Tur actividad pa e dia aki lo cuminsa desde 6or di atardi cu entretenimento di show, musica y naturalmente atraccion pa nos muchanan tambe manera Dino Jump y otro tipo di wegan-

an mas. Ya caba gruponan di baile, típico y tur otro agrupacion musical a wordo prepara pa e gran celebracion aki y por menciona cu lo bay tin hopi sorpresa cu lo wordo anuncia pronto. Pa es nan cu ta ansioso pa sa cua ta e bandanan cu lo bay haci nan presentacion riba e dia aki, esta dia 17 di maart, esaki nan lo ta entre otro, Tsunami, Prive, So What cu Myrugia de Cuba, Youth Extreme, Transformerz, Robert Jeandor, Rincon Boyz como tambe Claudius Philips & Oreó y mucho mas. Pues e anochi aki cuminsando desde oranan trempa di atardi te cu anochi laat, pueblo di Aruba ta keda cordialmente invita desde awor caba pa bini hunto y pa nos celebra cu orguyo nos 25 aña di Status Aparte den un forma unico y grandi den estilo di concierto y feria.